

摘藻堂四庫全書薈要

經部

欽定四庫全書薈要

經部

釋名卷

一至四

詳校官主事銜臣徐以坤



欽定四庫全書叢要

釋名目錄

卷一

釋天

釋地

釋山

釋水

釋丘



釋道

卷二

釋州國

釋形體

卷三

釋姿容

釋長幼

釋親屬

卷四

釋言語

釋飲食

釋綵帛

釋首飾

卷五

釋衣服

釋宮室

卷六

釋牀帳

釋書契

釋典藝

卷七

釋用器

釋樂器

釋兵

釋車

釋船

卷八

釋疾病

釋喪制

臣等謹按釋名八卷漢劉熙撰熙字成國北海人其書二十篇以音聲髣髴推論稱名辯物之意中間頗傷於穿鑿然去古未遠所釋

器物有可因以推求古人制度之遺者如楚辭九歌薜荔拍兮蕙綢王逸云拍搏辟也今併搏辟二字亦莫名其物觀是書釋牀帳篇乃知搏辟為以席搏著壁孔穎達禮記義疏以深衣十二幅皆交裁謂之衽是書釋衣服篇云衽襜也在旁襜襜然也則與玉藻言衽當旁合釋兵篇云刀室曰室口之飾曰琫室末之飾曰琕又足正毛詩詁訓傳之訛其

有資考証者非一也別本或題曰逸雅蓋明
郎奎金取是書與爾雅小爾雅廣雅埤雅合
刻名曰五雅以四書皆有雅名遂題逸雅以
從類非其本目今不從之乾隆四十年二月
恭校上

總纂官臣紀昀臣陸錫熊臣孫士毅

總校官臣陸費墀

劉熙釋名原序

熙以為自古造化制器立象有物以來迄于近代或典禮所制或出自民庶名號雅俗各方名殊聖人於時就而弗改以成其器著於既往哲夫巧士以為之名故興於其用而不易其舊所以宗易簡省事功也夫名之於實各有義類百姓日稱而不知其所以之意故撰天地陰陽四時邦國都鄙車服喪紀下及民庶應用之器論敘指歸謂之釋名凡二十七篇至於事類未能究備凡

所不載亦欲智者以類求之博物君子其於答難解惑
王父幼孫朝夕侍問以塞可謂之士聊可省諸

欽定四庫全書薈要卷三千三百十三

經部

釋名卷一

漢 劉熙 撰

釋天

天豫司充冀以舌腹言之天顯也在上高顯也青徐以
舌頭言之天垣也垣然高而遠也春曰蒼天陽氣始發
色蒼蒼也夏曰昊天其氣布散皓皓也秋曰旻天旻閔
也物就枯落可閔傷也冬曰上天其氣上騰與地絕也
故月令曰天氣上騰地氣下降易謂之乾乾健也健行

不息也又謂之玄玄懸也如懸物在上也 日實也光

明盛實也 月缺也滿則缺也 光晃也晃晃然也亦

言廣也所照廣遠也 景境也明所照處有境限也

晷規也如規畫也 曜耀也光明照耀也 星散也列

位布散也 宿宿也星各止宿其處也 氣餽也餽然

有聲而無形也 風充豫司冀橫口合唇言之風汜也

其氣博汜而動物也青徐言風蹶口開唇推氣言之風

放也氣放散也 陰陰也氣在內與陰也 陽揚也氣

在外發揚也 寒捍也捍格也 暑煮也熱如煮物也

熱藝也如火所燒藝也 雨羽也如鳥羽動則散也

春蠢也動而生也 夏假也寬假萬物使生長也

秋緝也緝迫品物使時成也 冬終也物終成也 四

時四方各一時時期也物之生死各應節期而止也

年進也進而前也 歲越也越故限也唐虞曰載載生

物也殷曰祀祀已也新氣升故氣已也 五行者五氣

也於其方各施行也 金禁也其氣剛嚴能禁制也

木冒也華葉自覆冒也 水準也準平物也 火化也

消化物也亦言毀也物入中皆毀壞也 土吐也能吐

生萬物也 子孳也陽氣始萌孳生於下也於易為坎

坎險也 丑紐也寒氣自屈紐也於易為艮艮限也時

未可聽物生限止之也 寅演也演生物也 卯冒也

載冒土而出也於易為震二月之時雷始震也 辰伸

也物皆伸舒而出也 巳巳也陽氣畢布巳也於易為

巽巽散也物皆生布散也 午午也陰氣從下上與陽

相忤逆也於易為離離麗也物皆附麗陽氣以茂也

未昧也日中則是向幽昧也 申身也物皆成其身體

各申束之使備成也 酉秀也秀者物皆成也於易為

兌兌悅也物得備足皆喜悅也 戌恤也物當收斂矜

恤之也亦言脫也落也 亥核也收藏百物核取其好

惡真偽也亦言物成皆堅核也 甲孚也萬物解孚甲

而生也 乙軋也自抽軋而出也 丙炳也物生炳然

皆著見也 丁壯也物體皆丁壯也 戊茂也物皆茂

盛也 己紀也皆有定形可紀識也 庚猶更也庚堅

強貌也 辛新也物初新者皆收成也 壬妊也陰陽

交物懷妊也至子而萌也 癸揆也揆度而生乃出之

也 霜喪也其氣慘毒物皆喪也 露慮也覆慮物也

雪綏也水下遇寒氣而凝綏綏然也 霰星也水雪

相搏如星而散也 霖霖小雨也言裁霖歷霑漬如人

沐頭惟及其上枝而根不濡也 雲猶云云衆盛意也

又言運也運行也 雷碾也如轉物有所碾雷之聲也

電殄也乍見則殄滅也 震戰也所擊輒破若攻戰

也又曰辟歷辟折也所歷皆破折也 電砲也其所中

物皆摧折如人所盛砲也 虹攻也純陽攻陰氣也又

曰蝮棘其見每於日在西而見於東掇飲東方之水氣

也見於西方曰升朝日始升而出見也又曰美人陰陽

不和婚姻錯亂淫風流行男美於女女美於男恒相奔

隨之時則此氣盛故以其盛時名之也 霓齧也其體

斷絕見於非時此灾氣也傷害於物如有所食齧也

暈捲也氣在外捲結之也日月俱然 陰而風曰曠曠

翳也言掩翳日光使不明也 風而雨土曰霾霾晦也

言如物塵晦之色也 珥氣在日兩旁之名也珥耳也

言似人耳之在面旁也 日月虧曰食稍稍侵虧如蟲

食草木葉也 晦灰也火死為灰月光盡似之也 朔

蘓也月死復蘓生也 弦月半之名也其形一旁曲一

旁直若張弓施弦也 望月滿之名也月大十六日小

十五日日在東月在西遙相望也 昏損也陽精損減

也 晨伸也旦而日光復伸見也 侵也赤黑之氣

相侵也 氛粉也潤氣著草木因寒凍凝色白若粉之

形也 霧冒也氣蒙亂覆冒物也蒙日光不明蒙蒙然

也 彗星光梢似彗也 孛蒲沒反星星旁氣孛孛然也

筆星星氣有一枝末銳似筆也 流星星轉行如流

水也 枉矢齊魯謂光景為枉矢言其光行若射矢之

所至也亦言其氣枉暴有所災害也 厲疾氣也中人

如磨厲傷物也 疫役也言有鬼行疫也 疠截也氣

傷人如有斷截也 灾哉也火所燒滅之餘曰哉言其
於物如是也 害割也如割削物也 異者異於常也
青瘡也如病者瘡瘦也 慝態也有姦態也 妖殀
也殀害物也 孽孽也遇之如物見髮孽也

釋地

地者底也其體底下載萬物也亦言諦也五土所生莫
不信諦也易謂之坤坤順也上順乾也 土吐也吐生
萬物也 已耕者曰田田填也五稼填滿其中也 壤

讓也肥濡意也 廣平曰原原元也如元氣廣大也

高平曰陸陸漉也水流漉而去也 下平曰衍言漫衍

也 下濕曰隰隰蟄也蟄溼意也 下而有水曰澤言

潤澤也 地不生物曰鹵鹵爐也如爐火處也 徐州

貢土五色有青黃赤白黑也 土青曰黎似黎草色也

土黃而細密曰埴埴膩也黏膩如脂之膩也 土赤

曰鼠肝似鼠肝色也 土白曰漂漂輕飛散也 土黑

曰盧盧然解散也

釋山

山產也產生物也土山曰阜阜厚也言高厚也大阜曰

陵陵隆也體高隆也 山頂曰冢冢腫也言腫起也山

旁曰陂言陂陁也 山脊曰岡岡亢也在上之言也

山旁隴間曰涌涌猶桶桶狹而長也 山大而高曰嵩

嵩竦也亦高稱也 山小高曰岑岑漸也漸然也 上

銳而長曰嶠形似橋也 小山別大山曰甌音彥甌甌也

甌一孔者甌形孤出處似之也 山多小石曰礧礧堯

也每石堯堯獨處而出見也 山多大石曰礪礪學也

大石之形學學然也 山有草木曰岵岵怙也人所怙

取以為事用也 山無草木曰屺屺圯也無所出生也

山上有水曰埒埒脫也脫而下流也 石載土曰岨

岨臚然也土載石曰崔嵬因形名之也 山東曰朝陽

山西曰夕陽隨日所照而名之也 山下根之受雷處

曰𪔐𪔐吮也吮得山之肥潤也 山中藜木曰林林森

也森森然也 山足曰麓麓陸也言水流順陸燥也

山體曰石石格也堅捍格也 小石曰礫礫料也小石相枝柱其間料料然出內氣也

釋水

天下大水四謂之四瀆江河淮濟是也 瀆獨也各獨出其所而入海也 江公也小水流入其中公共也 淮圍也圍繞揚州北界東至海也 河下也隨地下處而通流也 濟濟也源出河北濟河而南也 川穿也穿地而流也 山夾水曰澗澗間也言在兩山之間也

水正出曰濫泉濫街也如人口有所街口闔則見也
懸出曰沃泉水從上下有所灌沃也 側出曰洿泉
洿軌也流狹而長如車軌也 所出同所歸異曰淝泉
本同出時所浸潤少所歸各枝散而多似淝者也 水
從河出曰雍沛言在河岍限內時見雍出則沛然也
水上出曰湧泉瀆泉並是也 水洩出所為澤曰掌水
停處如手掌中也今兗州人謂澤曰掌也 水決復入
為汜汜已也如出有所為畢已而還入也 風吹水波

成文曰瀾瀾連也波體轉流相及連也 水小波曰淪

淪倫也小文相次有倫理也 水直波曰涇涇徑也言

如道徑也 水草交曰湄湄眉也臨水如眉臨目也水

經川歸之處也 海晦也主承穢濁其水黑如晦也

水注谷曰溝田間之水亦曰溝溝構也縱橫相交構也

注溝曰澮澮會也小溝之所聚會也 水中可居者

曰洲洲聚也人及鳥物所聚息之處也 小洲曰渚渚

遮也體高能遮水使從旁迴也 小渚曰沚沚止也小

可以止息其上也 小沚曰泚泚遲也能遏水使流遲也 人所為之曰滴滴術也堰使水鬱術也魚梁水碓之謂也 海中可居者曰島島到也人所奔到也亦言鳥也物所赴如鳥之下也

釋丘

丘一成曰頓丘一頓而成無上下大小之殺也 再成曰陶丘於高山上一重作之如陶竈然也 三成曰崑崙如崑崙之高而積重也 前高曰髦丘如馬舉頭

垂髦也 中央下曰宛丘有丘宛宛如偃器也涇上有

一泉水亦是也 偏高曰阿丘阿荷也如人擔荷物一

邊偏高也 畝丘丘體滿一畝之地也 圜丘方丘就

其方圜名之也 銳上曰融丘融明也明陽也凡上銳

皆高而近陽者也 如乘曰乘丘四馬曰乘一基在後

似車四列在前似駕車馬之形也 如階之與反者曰階

丘形似水中之高地隆高而廣也 水潦所止曰泥丘

其止污水留不去成泥也 澤中有丘曰都丘言蟲鳥

往所都聚也 當途曰梧丘梧忤也與人相當忤也
道出其右曰畫丘人尚右凡有指畫皆用右也 道出
其前曰載丘在前故載也 道出其後曰昌丘 水出
其前曰陟丘陟基趾也言所出然 水出其後曰阻丘
此水以為險也 水出其右曰沚丘沚止也西方義氣
有所制止也 水出其左曰營丘 丘高曰陽丘體高
近陽也 宗丘邑中所宗也

釋道

道一達曰道路道蹈也 路露也人所踐蹈而露見也

二達曰歧旁物兩為歧在邊曰旁此道並通出似之

也 三達曰劇旁古者列樹以表道道有夾溝以通水

潦恒見修治之道旁轉多用功稍劇也 四達曰衢齊

魯謂四齒杷為櫂櫂地則有四處此道似之也 五

達曰康康昌也昌盛也車步併列並用之言充盛也

六達曰莊莊裒也裒其上使高也 七達曰劇驂驂馬

有四耳今此道有七比於劇也 八達曰崇期崇充也

道多所通人充滿其上如共期也 九達曰達齊魯謂
道多為達師此形然也 城下道曰隄隄翽也都邑之
內翽翽祖駕之處也 步所用道曰蹊蹊係也射疾則
用之故還係於正道也 徑經也人所經由也 鹿兔
之道曰亢行不由正亢陌山谷草野而過也 涂度也
人所由得通度也

釋名卷一

欽定四庫全書薈要卷三千三百十四

經部

釋名卷二

漢 劉熙 撰

釋州國

青州在東取物生而青也州注也郡國所注仰也徐

州徐舒也土氣舒緩也揚州州界多水水波揚也

荊州取名於荊山也必取荊為名者荊警也南蠻數為

寇逆其民有道後服無道先彊常警備之也豫州地

在九州之中京師東都所在常安豫也涼州西方所

在寒涼也 雍州在四山之內雍翳也 并州曰土無

也其州或并或設故因以為名也 幽州在北幽昧之

地也 冀州亦取地以為名也其地有險有易帝王所

都亂則冀治弱則冀彊荒則冀豐也 兗州取兗水以

為名也 司州司隸校尉所主也 益州益阨也所在

之地險阨也 古有營州齊衛之地於天文屬營室取

其名也 燕宛也北方沙漠平廣比地在涿鹿山南宛

宛然以為國都也 宋送也地接淮泗而東南傾以為

殷後若云滓穢所在送使隨流東入海也 鄭町也其

地多平町町然也 楚辛也其地蠻多而人性急數有

戰爭相爭相害辛楚之禍也 周地在岐山之南其山

四周也 秦津也其地沃衍有津潤也 晉進也其土

在北有事於中國則進而南也又取晉水以為名其水

迅進也 趙朝也本小邑朝事於大國也 魯魯鈍也

國多山水民性樸魯也 衛衛也既滅殷立武庚為殷

後三監以守衛之也 齊齊也地在渤海之南勃齊之

中也 吳虞也太伯讓位而不就歸封之於此虞其志

也 越夷蠻之國也度越禮義無所拘也此十三國上

應列宿各以其地及於事宜制此名也至秦改諸侯置
郡縣隨其所在山川土形而立其名漢就而因之也

河南在河之南也 河內河水從岐山而南從雷首而

東從譚首而北郡在其內也 河東在河水東也 河

西在河水西也 上黨黨所也在山上其所最高故曰

上也 潁川因潁水為名也 汝南在汝水南也 汝

陰在汝水陰也 東郡南郡皆以京師方面言之也
北海海在其北也 西海海在其西也 南海在海南
也宜言海南欲同四海名故言南海 東海海在其東
也 濟南濟水在其南也 濟北濟水在其北也義亦
如南海也 濟陰在濟水之陰也 南陽在國之南而
地陽也凡若此類郡國之名取號於此則其餘可知也
縣邑之名亦如之 大曰邦邦封也封有功於是也

國城曰都者國君所居人所都會也 周制九夫為井

其制似井字也四井為邑邑猶悒也邑人聚會之稱也
四邑為丘丘聚也 四丘為甸甸乘也出兵車一乘
也 鄙否也小邑不能遠通也 縣懸也懸係於郡也
郡羣也人所羣聚也 五家為伍以五為名也又謂
之鄰鄰連也相接連也又曰比相親比也 五鄰為里
居方一里之中也 五百家為黨黨長也一聚之所尊
長也 萬二千五百家為鄉鄉向也衆所向也

釋形體

人仁也仁生物也故易曰立人之道曰仁與義 體第
也骨肉毛血表裏大小相次第也 軀區也是衆名之
大總若區域也 形有形象之異也 身伸也可屈伸
也 毛貌也冒也在表所以別形貌且以自覆冒也

皮被也被覆體也 膚布也布在表也 肌慳也膚幕

堅慳也 骨滑也骨堅而滑也 肌枝也似水之枝格

也 肉柔也 筋力也肉中之力氣之元也斬固於身

形也 膜幕也幕絡一體也 血澁也出於肉流而澁

澁也 膿醲也 汁醲厚也 汁涕也 涕涕而出也 津

進也 汁進出也 洵澤也 有潤澤也 汗澤也 出在於

表 澤澤然也 髓遺也 遺瀆也 髮拔也 拔擢而出也

鬢峻也 所生高峻也 髦冒也 覆冒頭頸也 眉媚

也有斌媚也 頭獨也 於體高而獨也 首始也 面

漫也 額鄂也 有垠鄂也 故幽州人則謂之鄂也 角

者生於額角也 頰鞍也 偃折如鞍也 目默也 默而

內識也 眼限也 童子限限而出也 睫挿接也 挿於

眼眶而相接也 瞳子瞳重也膚幕相裏重也子小稱

也主謂其精明者也或曰眸子眸冒也相裏冒也 鼻

嚙也出氣嚙嚙也 口空也 頰夾也兩旁稱也亦取

挾飲食物也 舌泄也舒泄所當言也 齒始也少長

之別始乎此也以齒食多者長也食少者幼也 頤養

也動於下止於上下咀物以養人也 牙摠牙也隨

形言之也 輔車其骨強所以輔持口也或曰牙車牙

所載也或曰頷頷舍也口舍物之車也或曰頰車亦所

以載物也或曰鼪車鼪鼠之食積於頰人食似之故取名也凡繫於車皆取在下載上物也耳𪔐也耳有一

體屬著兩邊𪔐然也脣緣也口之緣也吻免也

入之則碎出則免也又取枚也漱唾所出恒加枚拭因以為名也舌卷也可以卷制食物使不落也鼻下

曰立人取立於鼻下狹而長似人立也口上曰髭髭姿也為姿容之美也口下曰承漿漿水也頤下曰

鬚鬚秀也物成乃秀人成而鬚生也亦取須體幹長而

後生也 在頰耳旁曰髯隨口動搖髯髯然也 其上

連髮曰鬢鬢濱也濱崖也為面額之崖岸也 鬢曲頭

曰距距拒也言其曲似拒也 項确也堅确受枕之處

也 頸徑也徑挺而長也 咽咽物也 櫻在頤纓理

之中也青徐謂之脰物投其中受而下之也又謂之噍

氣所流通阨要之處也 胡互也在咽下垂能歛互物

也 胸猶啞也啞氣所衝也 臆猶抑也抑氣所塞也

膺壅也氣所壅塞也 腹複也富也腸胃之屬以自

裏盛復於外復之其中多品似富者也 心纖也所識

纖微無物不貫心也 肝幹也五行屬木故其體狀有

枝幹也凡物以大為幹也 肺勃也言其氣勃鬱也

脾裨也在胃下裨助胃氣主化穀也 腎引也腎屬水

主引水氣灌注諸脉也 胃圍也圍受食物也 腸暢

也通暢胃氣去滓穢也 臍濟也腸端之所限制也

胞匏也匏空虛之言也主以虛承水洩也或曰膀胱言

其體短而橫廣也 自臍以下曰水腹水洩所聚也又

曰少腹少小也比於臍以上為小也 陰蔭也言所在

蔭翳也 脇挾也在兩旁臂所挾也 肋勒也檢勒五

臟也 膈塞也塞上下使氣與穀不相亂也 腋繹也

言可張翕尋繹也 肩堅也 甲盭也與胸脇皆相會

盭也 臂裨也在旁曰裨也 肘注也可隱注也 腕

宛也言可宛屈也 掌言可以排掌也 手須也事業

之所須也 節有限節也 爪紹也筋極為爪紹續指

端也 背倍也在後稱也 脊積也積續骨節終上下

也 尾微也承脊之末稍微殺也 要約也在體之中

約結而小也 髓緩也其腋皮厚而緩也 臀殿也高

厚有殿選也 尻廖也尻所在寥牢深也樞機也要髀

股動搖如樞機也 髀卑也在下稱也 股固也為強

固也 膝伸也可屈伸也 脚却也以其坐時却在後

也 脛莖也直而長似物莖也 膝頭曰膊膊圍也因

形團圍而名之也 或曰蹠蹠扁也亦因形而名之也

足續也言續脛也 趾止也言行一進一止也 蹄

底也即足底也 踝确也居足兩旁磽确然也亦因其
形踝踝然也 足後曰跟在旁著地一體任之象木
根也 踵鍾也鍾聚也上體之所鍾聚也

釋名卷二

欽定四庫全書薈要卷三千三百十五

經部

釋名卷三

漢 劉熙 撰

釋姿容

姿資也資取也形貌之稟取為資本也 容用也合事

宜之用也 妍研也研精於事宜則無蚩繆也蚩癡也

兩脚進曰行行抗也抗足而前也 徐行曰步步捕

也如有所伺捕務安詳也 疾行曰趨趨赴也赴所至

也 疾趨曰走走奏也促有所奏至也 奔變也有急

變奔赴之也 仆踣也頓踣而前也 超卓也舉脚有

所卓越也 跳條也如草木枝條務上行也 立林也

如林木森然各駐其所也 騎支也兩脚支別也 乘

陞也登亦如之也 載載也在其上也 儋任也任力

所勝也 負背也置項背也 駐株也如株木不動也

坐挫也骨節挫屈也 伏覆也偃安也 僵正直重

然也 側逼也 據居也 企啟開也目延竦之時諸

機樞皆開張也 竦從也體皮皆從引也 視是也察

是非也 聽靜也靜然後所聞審也 觀翰也望之延

頸翰翰也 望茫也遠視茫茫也 跪危也兩膝隱地

體危倪也 跽忌也見所敬忌不敢自安也 拜於丈

夫為跌跌然屈折下就地也於婦人為扶自抽扶而上

下也 攀翻也連翻上及言也 掣制也制頓之使順

己也 牽弦也使弦急也 引演也徒演廣也 掬局

也使相局近也 撮粹也暫粹取之也 搯义也五指

俱往也 捉促也使相促及也 執攝也使畏攝己也

拈黏也兩指翕之黏著不放也 扶鐵也其處皮薰

黑色如鐵也 躡榻也榻著地也 批裨也兩相裨助

共擊之也 搏博也四指廣博亦似擊之也 挾夾也

在旁也 捧逢也兩手相逢以執之也 懷回也本有

去意回來就己也亦言歸也來歸己也 抱保也相親

保也 戴載也載之於頭也 提地也臂垂所持近地

也 挈結也結束也束持之也 持跣也跣之於手中

也 操抄也手出其下之言也 攬斂也斂置手中也

擁翁也翁撫之也 撫敷也敷手以拍之也 拍搏

也手搏其上也 摩娑猶未殺也手上下之言也 蹙

遵也遵迫之也 踐殘也使殘壞也 踏藉也以足藉

也 履以足履之因以名之也 蹈道也以足踐之如

道路也 跣弭也足踐之使弭服也 躡懾也登其上

使懾服也 匍匐小兒時也匍猶捕也藉索可執取之

言也匍伏也伏地行也人雖長大及其求事盡力之勤

猶亦稱之詩曰凡民有喪匍匐救之是也 偃蹇也偃

息而臥不執事也 蹇跛蹇也病不能作事今託病似

此而不宜執事役也 望佯佯陽也言陽氣在上舉頭

高似若望之然也 沐禿也沐者髮下垂禿者無髮皆

無上貌之稱也 卦賣卦掛也自卦於市而自賣邊自

可無慙色言此似之也 倚筵倚伎也筵作清筵也言

人多技巧尚輕細如筵也 窶數猶局縮皆小意也

齧掣掣卷掣也齧噬齧也語說卷掣與人相持齧也

鯀摘猶譎摘也如醫別人鯀知疾之意見事者之稱也

貸駢者貸言以物貸予駢者言必棄之不復得也不
相量事者之稱也此皆見於形貌者也 臥化也精氣
變化不與覺時同也 寐謐也靜謐無聲也 寢權假
臥之名也寢侵也侵損事功也 眠泯也無知泯泯也
覺告也 寤忤也能與物相接忤也 欠欵也開張
其口聲唇欵欵也 嚏躑也聲作躑而出也 笑鈔也
頰皮上鈔者也

釋長幼

人始生曰嬰兒胸前曰嬰抱之嬰前乳養之也或曰嬰

媿嬰是也言是人也媿其啼聲也故因以名之也 男

任也典任事也 女如也婦人外成如人也故三從之

義少如父教嫁如夫命老如子言青徐州曰媿媿忤也

始生時人意不喜忤忤然也 兒始能行曰孺孺濡也

言濡弱也 七年曰悼悼逃也知有廉耻隱逃其情也

亦言是時而死可傷悼也 毀齒曰齠齠洗也毀洗故

齒更生新也 長丁丈反長也言體長也 幼少也言生

日少也 十五曰童故禮有陽童牛羊之無角者曰童
山無草木曰童言未巾冠似之也女子之未笄者亦稱
之也 二十曰弱言柔弱也 三十曰壯言丁壯也

四十曰強言堅強也 五十曰艾艾治也治事能斷割
艾刈無所疑也 六十曰耆耆指也不從力役指事使
人也 七十曰耄頭髮白耄耄然也 八十曰耄耄鐵
也皮膚變黑色如鐵也 九十曰鮐背背有鮐文也或
曰黃耆鬚髮變黃也耆垢也皮色驪悴恒如有垢者也

或曰胡耆咽皮如鷄胡也或曰凍梨皮有班黑如凍梨色也或曰齟齟大齒落盡更生細者如小兒齒也 百年曰期頤頤養也老昏不復知服味善惡孝子期於盡養道而已也 老朽也老而不死曰仙仙遷也遷入山也故其制字人旁作山也

釋親屬

親襯也言相隱襯也 屬續也恩相連續也 父甫也 始生己也 母冒也含生己也 祖祚也祚物先也又

謂之王父王暉也家中所歸暉也王母亦如之 曾祖
從下推上祖位轉增益也 高祖高皐也最在上皐韜

諸下也 兄荒也荒大也故青徐人謂兄為荒也 弟

第也相次第而上也 子孳也相生蕃孳也 孫遜也

遜遁在後生也 曾孫義如曾祖也 玄孫玄懸也上

懸於高祖最在下也 玄孫之子曰來孫此在無服之

外其意疎遠呼之乃來也 來孫之子曰昆孫昆貫也

恩情轉遠以禮貫連之耳 昆孫之子曰仍孫以禮仍

有之耳恩意實遠也 仍孫之子曰雲孫言去已遠如

浮雲也皆為早娶晚死壽考者言也 父之兄曰世父

言為嫡統繼世也又曰伯父伯把也把持家政也 父

之弟曰仲父仲中也位在中也 仲父之弟曰叔父叔

少也 叔之弟曰季父季癸也甲乙之次癸最在下季

亦然也 父之世叔父母曰從祖父母言從已親祖別

而下也亦言隨從已祖以為名也 父之姊妹曰姑姑

故也言於已為久故之人也 姊積也猶日始出積時

多而明也 妹昧也猶日始入歷時少尚昧也 姑謂

兄弟之女為姪姪迭也共行事夫更迭進御也 夫之

父曰舅舅舅久也久老稱也 夫之母曰姑亦言故也

母之兄弟曰舅亦如之也 妻之父曰外舅母曰外姑

言妻從外來謂至己家為婦故反以此義稱之夫妻匹

敵之義也 妻之昆弟曰外甥其姊妹女也來歸己內

為妻故其男為外甥之甥甥者生也他姓子本生於外

不得如其女來在己內也 姊妹之子曰出出嫁於異

姓而生之也 出之子曰離孫言遠離己也 姪之子

曰歸孫婦人謂嫁曰歸姪子列故其所生為孫也 妻

之姊妹曰娣娣弟也言與己妻相長弟也 母之姊妹

曰姨亦如之禮謂之從母為娣而來則從母列也故雖

不來猶以此名之也 姊妹互相謂夫曰私言於其夫

兄弟之中此人與己姊妹有恩私也 舅謂姊妹之子

曰甥甥亦生也出配他男而生故其制字舅旁從生也

妾謂夫人之嫡妻曰女君夫為男君故名其妻曰女

君也 嫂叟也叟老者稱也叟縮也人及物老皆縮小

於舊也 叔少也幼者稱也叔亦倣也見嫂倣然却退

也 夫之兄曰公公君也君尊稱也 俗間曰兄章章

灼也章灼敬奉之也又曰兄忪是己所敬見之怔忡自

肅齊也俗或謂舅曰章又曰忪亦如之也 少婦謂長

婦曰姒言其先來己所當法似也 長婦謂少婦曰娣

娣弟也以後來也或曰先後以來先後言之也 青徐

人謂長婦曰植長禾苗先生者曰植取名於此也荆豫

人謂長婦曰熟熟祝也祝始也 兩壻相謂曰亞言一

人取姊一人取妹相亞次也又並來至女氏門姊夫在

前妹夫在後亦相亞而相倚共成其禮也又曰友壻言

相親友也 婦之父曰婚言壻親迎用昏又恒以昏夜

成禮也 壻之父曰姻姻因也女往因媒也 天子之

妃曰后后後也言在後不敢以副言也 諸侯之妃曰

夫人夫扶也扶助其君也 卿之妃曰内子子女子也

在閨門之内治家也 大夫之妃曰命婦婦服也服家

事也夫受命於朝妻受命於家也 士庶人曰妻妻齊

也夫賤不足以尊稱故齊等言也 天子妾有嬪嬪賓

也諸妾之中見賓敬也 妾接也以賤見接幸也姪娣

曰媵媵承事嫡也 配葦也一人獨處一人往葦耦之

也 匹辟也往相辟耦也耦遇也二人相對遇也 嫡

敵也與匹相敵也 庶撫也拾撫之也謂拾撫微陋待

遇之也 無妻曰鰥鰥昆也昆明也愁悒不寐目恒鰥

鰥然也故其字從魚魚目恒不閉者也 無夫曰寡寡

踈也踈踈單獨之言也 無父曰孤孤顧也顧望無所
瞻見也 老而無子曰獨獨隻獨也言無所依也

釋名卷三

欽定四庫全書會要卷三千三百十六

經部

釋名卷四

漢 劉熙 撰

釋言語

道導也所以通導萬物也 德得也得事宜也 文者

會集衆綵以成錦繡會集衆字以成辭義如文繡然也

武舞也征伐動行如物鼓舞也故樂記曰發揚蹈厲

太公之志也 仁忍也好生惡殺善含忍也 義宜也

裁制事物使合宜也 禮體也得事體也 智知也無

所不知也 信申也言以相申束使不相違也 孝好

也愛好父母如所悅好也孝經說曰孝畜也畜養也

慈字也字愛物也 友有也相保有也 恭拱也自拱

持也亦言供給事人也 悌弟也 敬警也恒自肅警

也 漫漫也漫漫心無所限忌也 通洞也無所不貫

洞也 達徹也 敏閔也進敘無否滯之言也故汝頴

言敏曰閔也 篤築也築堅實稱也 厚後也有終後

也故青徐人言厚曰後也 薄迫也單薄相逼迫也

懿優也言與優也 良量也量力而動不敢越限也

言宣也宣彼此之意也 語敘也敘己所欲說也 說

述也序述之也 序杼也棧杼其實也 泄泄也發泄

出之也 發撥也撥使開也 撥播也播使移散也

導陶也陶演己意也 演延也言蔓延而廣也 頌容

也序說其成功之形容也 讚錄也省錄之也 銘名

也記名其功也 勒刻也刻識之也 紀記也紀識之

也識幟也有章幟可按視也 視是也察其是非也

是嗜也人嗜樂之也 非排也人所惡排去也 基據

也在下物所依據也 業捷也事捷乃有功業也 事

偉也偉立也凡所立之功也故青徐言立曰偉也 功

攻也攻治之乃成也 取趣也 名明也名實事使分

明也 號呼也以其善惡呼名之也 善演也演盡物

理也 惡扼也扼困物也 好巧也如巧者之造物無

不皆善人好之也 醜臭也如臭穢也 遲顏也不進

之言也 疾截也有所越截也 緩浣也斷也持之不

急則動搖浣斷自放縱也 急及也操切之使相逮及

也 巧考也考合異類共成一體也 拙屈也使物否

屈不為用也 燥焦也 濕浥也 彊畫也 弱衄也

言委也 能該也無物不兼該也 否鄙也鄙劣不

能有所堪成也 躁燥也物燥乃動而飛揚也 靜整

也 逆還也言不從其理則生殿還不順也 順循也

循其理也 清青也去濁遠穢色如青也 濁瀆也汁

滓演瀆也 貴歸也物所歸仰也汝頰言貴聲如歸往

之歸也 賤踐也卑下見踐履也 榮猶熒也熒熒照

明貌也 辱衄也言折衄也 禍毀也言毀滅也 福

富也其中多品如富者也 進引也引而前也 退墜

也 羸累也恒累於人也 健建也能有所建為也

哀愛也愛乃思念之也 樂樂也使人好樂之也 委

萎也萎蕤就之也 曲局也相近局也 蹤從也人形

從之也 跡積也積累而前也 扶傳也傳近之也將

救護之也 縛薄也使相薄著也 束促也相促近也

覆孚也如孚甲之在物外也 盖加也加物上也

威畏也可畏懼也 嚴儼也儼然人憚之也 政正也

下所取正也 教傲也下所法傲也 侍時也尊者不

言常於時供所當進者也 御語也尊者將有所欲先

語之也亦言職卑尊者所勒御如御牛馬然也 雅雒

也為之難人將為之雒雒然憚之也 俗欲也俗人所

欲也 艱根也如物根也 難憚也人所忌憚也 吉

實也有善實也 凶空也就空亡也 停定也定於所

在也 起啟也 啓一舉體也 翺敖也 言敖遊也 翔

佯也 言仿佯也 出推也 推而前也 入納也 納使還

也 候護也 司護諸事也 望惘也 視遠惘惘也 狡

交也 與物交錯也 夬夬也 有所破壞決裂之於終始

也 始息也 言滋息也 消削也 言減削也 息塞也

塞滿也 姦奸也 言奸正法也 宄危也 危易常正也

誰相也 有相擇言不能一也 往睚也 歸睚於彼也

故其言之於印頭以指遠也 來哀也 使來入己哀之

故其言之低頭以招之也 麤錯也相遠之言也 納

弭也弭弭兩致之言也 疏索也獲索相遠也 密蜜

也如蜜所塗無不滿也 甘含也人所含也 苦吐也

人所吐也 安晏也晏晏然和喜無動懼也 危阢也

阢阢不固之言也 成盛也 敗潰也 亂渾也 治

值也物皆值其所也 煩繁也物繁則相雜撓也 省

嗇也嗇約少之言也 間簡也事功簡省也 劇巨

也事功巨也 貞定也精定不動惑也 淫浸也浸淫

旁入之言也 沈澹也澹然安著之言也 浮孚也孚

甲在上稱也 貪探也探入他分也 廉歛也自檢歛

也 潔確也確然不羣貌也 污洿也如洿泥也 公

廣也可廣施也 私恤也所恤念也 勇踴也遇敵踴

躍欲擊之也 怯脇也見敵恐脇也 斷段也分為異

段也 絕截也如割截也 罵迫也以惡言被迫人也

詈歷也以惡言相彌歷也亦言離也以此掛離之也

祝屬也以善惡之詞相屬著也 詛阻也使人行事

阻限於言也 盟明也告其事於神明也 誓制也以

拘制之也 佐左也在左右也 助乍也乍往相阻非

長久也 飾拭也物穢者拭其上使明由他物而後明

猶加文於質上也 蕩盪也排盪去穢垢也 啜啜也

心有所念惛然發此聲也 嗟佐也言之不足以盡意

故發此聲以自佐也 噫憶也憶念之故發此聲憶之

也 嗚舒也氣憤滿故發此聲以舒寫之也 念黏也

意相親愛心黏著不能忘也 憶意也恒在意中也

思司也凡有所司捕必靜思忖亦然也 克刻也刻物
有定處人所克念有常心也 慮旅也旅衆也易曰一
致百慮慮及衆物以一定之也

釋飲食

飲奄也以口奄而引咽之也 食殖也所以自生殖也
啜絕也乍啜而絕於口也 餐乾也乾入口也 吮
循也不絕口稍引滋洩循咽而下也 嗽促也用口急
促也 含合也合口停之也銜亦然也 咀藉也以藉

齒牙也 嚼削也稍削也 鳥曰啄如啄物上復下也

獸曰齧齧齧也所臨則禿齧也 餅并也溲麩使合

并也 胡餅作之大漫沍也亦言以胡麻著上也蒸餅

湯餅蝎餅髓餅金餅索餅之屬皆隨形而名之也 糝

穀也相黏穀也 餌而也相黏而也 兗豫曰溲泔就

形名之也 糝漬也蒸燥屑使相潤漬餅之也 饋分

也衆粒各自分也 殮散也投水於中解散也 嘆汪

也汁汪郎也 膈蒿也香氣蒿蒿也 糜煮米使糜爛

也 粥濯於糜粥粥然也 漿將也飲之寒温多少與

體相將順也 湯熱湯湯也 酪澤也乳作汁所使人

肥澤也 藿濟也與諸味相濟成也 菹阻也生釀之

遂使阻於寒温之間不得爛也 醕投也味相投成也

醢海也冥也封塗使密冥乃成也 醢多汁者曰醢醢

瀋也宋魯人皆謂汁為瀋醢有骨者曰醢如吮反 醢肌也

骨肉相搏肌無汁也 豉嗜也五味調和須之而成乃

可甘嗜也故齊人謂豉聲如嗜也 麩朽也鬱之使生

衣朽敗也 蘖缺也清麥覆之使生牙開缺也 鮓菹

也以鹽米釀之如菹熟而食之也 腊乾昔也 脯搏

也乾燥相搏著也又曰脩脩縮也乾燥而縮也 膊迫

也薄柶肉迫著物使燥也 膾會也細切肉令散分其

赤白異切之已乃會合和之也 炙炙也炙於火上也

脯炙以餈蜜豉汁淹之脯脯然也 釜炙於釜汁中

和熟之也 脂銜也銜炙細密肉和以薑椒鹽豉已乃

以肉銜裏其表而炙之也 貊炙全體炙之各自以刀

割出於胡貊之為也 膾細切猪羊馬肉使如膾也 生

脰以一分膾二分細切合和挺攪之也 血脂以血作

之增其酢豉之味使苦苦以消酒也 消膏而加蕝其

中亦以消酒也 生淪蔥薤曰兌言其柔滑兌兌然也

韓羊韓兔韓鷄本法出韓國所為也猶酒言宜成

醪蒼梧清之屬也 臠與也藏肉於臠內稍出用之也

臠赴也夏月赴疾作之久則臭也 分乾切猪肉以

梧分乾其中而和之也 肺臠臠饋也以米糝之如膏

饋也 鷄纖細擗其腊令纖然後漬以酢也免纖亦如
之 餈洋也煮米消爛洋洋然也 飴小弱於餈形怡
怡也 哺舖也如餈而濁可舖也 酒酉也釀之米麴
酉澤久而味美也亦言馭也能否皆彊相馭待飲之也
又入口咽之皆馭其面也 緹齊色赤如緹也 盎齊
盎滂滂然濁色也 汎齊浮蟻在上汎汎然也 沉齊
濁滓沉下汁清在上也 醴齊醴禮也釀之一宿而成
禮有酒味而已也 醪酒久釀酉澤也 事酒有事而

釀之酒也 苦酒淳毒甚者酢苦也 寒粥末稻米投

寒水中育育然也 干飯飯而暴乾之也糗齧也飯而

磨之使齧碎也 餓候也候人饑者以食之也煮麥曰

麩麩亦齧也煮熟亦齧壞也 柰油搗柰實和以塗繒

上燥而發之形似油也柰油亦如之 桃濫水漬而藏

之其味濫濫然酢也 柰脯切柰暴乾之如脯也 鮑

魚鮑腐也埋藏奄使腐臭也 蟹胥取蟹藏之使骨肉

解之胥胥然也 蟹齏去其匡齏熟搗之令如齏也

桃諸藏桃也諸儲也藏以為儲待給冬月用之也 瓠
蓄皮瓠以為脯蓄積以待冬月時用之也

釋綵帛

青生也象物生時色也 赤赫也太陽之色也 黃晃
也猶晃晃象日光色也 白啟也如水啟時色也 黑
晦也如晦冥時色也 絳工也染之難得色以得色為
工也 紫疵也非正色五色之疵瑕以惑人者也 紅
絳也白色之似絳者也 緇桑也如桑葉初生之色也

綠澗也荆泉之水於上視之澗然綠色此似之也

縹猶漂漂淺青色也有碧縹有天縹有骨縹各以其色所象言之也 緇滓也泥之黑者曰滓此色然也 皂

早也日未出時早起視物皆黑此色如之也 布布也

布列衆縷為經以緯橫成之也又太古衣皮女工之始始於是施布其法使民盡用之也 踈者言其經緯踈

也 絹絀也其絲絀厚而踈也 縑兼也其絲細緻數

兼於布絹也細緻染縑為五色細且緻不漏水也 練

爛也煮使委爛也 素朴素也已織則供用不復加巧

飾也又物不加飾皆自謂之素此色然也 緋似蜚蟲

之色綠而澤也 錦金也作之用功重於其價如金故

其制字帛與金也 綺歌也其文歌邪不順經緯之縱

橫也有杯文形似杯也有長命其綵色相間皆橫終幅

此之謂也言長命者服之使人命長本造意之意也有

棋文者方文如棋也 綾凌也其文望之如水凌之理

也 繡修也文修修然也 羅文踈羅也纚篋也麤可

以篋物也令辟經絲貫杼中一間并一間䟽䟽者苓苓

然并者歷辟而密也 紡麤絲織之曰䟽䟽寥也寥寥

然也 穀粟也其形足足而踈視之如粟也又謂沙穀

亦取踈踈如沙也 總齊人謂涼謂惠言服之輕細涼

惠也 紈渙也細澤有光煥煥然也 蒸栗染紺使黃

色如蒸栗然也 紺含也青而含赤色也 緜猶洒洒

柔而無文也 綸倫也作之有倫理也 絮胥也胥久

故解落也 紬抽也抽引絲端出細緒也又謂之絳絳

挂也挂於帳端振舉之也 繭曰幕也貧者著衣可以
幕絡絮也或謂之牽離煮熟爛牽引使離散如繇然也
釋首飾

冠貫也所以貫韜髮也 纓頸也自上而繫於頸也

笄係也所以繫冠使不墜也 祭服曰冕冕猶俛也俛

平直貌也亦言文也玄上纁下前後垂珠有文飾也

有衮冕衮卷也畫卷龍於衣也 有鷩冕鷩雉之慙惡

者山鷩是也鷩鳥慙也性急慙不可生服必自殺故畫其

形於衣以象人執耿介之節也

毳冕 毳芮也 畫藻文

於衣象水草之毳芮溫暖而潔也

黻冕 黻 紕也 畫黻

紕文綵於衣也此皆隨衣而名之也所垂前後珠轉減

耳 章甫殷冠名也甫丈夫也服之所以表章丈夫也

牟追牟冒也言其形冒髮追追然也 收夏后氏冠

名也言收斂髮也 委貌冠形又委貌之貌上小下大

也 弁如兩手相合拊時也以爵韋為之謂之爵弁以

鹿皮為之謂之皮弁以韎韋為之謂之韋弁也 纚以

韜髮者也以纚為之因以為名 總束髮也總而束之

也 幘蹟也下齊員蹟然也充上下小大充充然也或

曰眈眈折其後也或曰幘形似幘也賤者所著曰充髮
作之裁裏髮也或曰牛心形似之也 帽冒也巾謹也

二十成人士冠庶人巾當自謹修於四教也 簪珥也

以珥連冠於髮也又枝也因形名之也 掃摘也所以

摘髮也 導所以導櫟鬢髮使入巾幘之裏也或曰櫟

鬢以事名之也 鏡景也言有光景也 梳言其齒䟽

也數言比比於踈其齒差數也比言細相比也 刷帥

也帥髮長短皆令上從也亦言瑟也刷髮令上瑟然也

攝攝也攝取髮也 綃頭綃鈔也鈔髮使上從也或

曰陌頭言其從後橫陌而前也齊人謂之掩言掩歛髮

使上從也 王后首飾曰副副覆也以覆首亦言副貳

也兼用衆物成其飾也 編編髮為之次第髮也 鬕

髮被也髮少者得以被助其髮也 髻剔也剔刑人之

髮為之也 步搖上有垂珠步則搖也 箇恢也恢廓

覆髮上也魯人曰頰頰傾也著之傾近前也齊人曰幌
飾形貌也華象艸木華也勝言人形容正等一人著
之則勝也蔽髮前為飾也爵釵釵頭及上施爵也
瑱鎮也懸當耳旁不欲使人妄聽自鎮重也或曰充
耳充塞也塞耳亦所以止聽也故里語曰不瘖不聾不
成姑公穿耳施珠曰瑄此本出於蠻夷所為也蠻夷
婦女輕淫好走故以此琅瑄錘之也今中國人倣之耳
脂砥也著面柔滑如砥石也粉分也研米使分散

也 胡粉胡餽也脂和以塗面也 黛代也滅眉毛去
之以此畫代其處也 脣脂以丹作之象脣赤也 香
澤者人髮恒枯悴以此濡澤之也 彊其性凝強以制
服亂髮也 以丹注面曰勺勺灼也此本天子諸侯羣
妾當以次進御其有月事者止而不御重以口說故注
此於面灼然為識女史見之則不書其名於第錄也
耨粉耨赤也染粉使赤以著頰上也

釋名卷四



覆校官助教臣吳省蘭

校對官庶士臣朱攸

謄錄貢生臣潘沛然

欽定四庫全書會要

經部

釋名卷

八五至

詳校官主事銜臣徐以坤



欽定四庫全書薈要卷三千三百十七

經部

釋名卷五

漢 劉熙 撰

釋衣服

軛服 上曰衣衣依也人所依以芘寒暑也 下曰裳裳障也所以自障蔽也 領頸也以壅頸也亦言總領衣

體為端首也 襟禁也交於前所以禁禦風寒也 袂

掣也掣開也開張之以受臂屈伸也 祛虛也 袖由

也手所由出入也亦言受也以受手也 衿亦禁也禁

使不得解散也 帶帶也著於衣如物之繫帶也 系

繫也相連繫也 衽襟也在旁襟襟然也 裾裾也裾

倨然直亦言在後常見踞也 玄端其袖下正直端方

與要接也 素積素裳也辟積其要中使跂因以名之

也 王后之上服曰褱衣畫翬雉之文於衣也伊洛而

南雉青質五色備曰翬翟畫鷩雉之文於衣也江淮

而南雉素質五采皆備成章曰鷩 闕翟剪闕繒為翟

雉形以綴衣也 鞠衣黃如菊花色也 禮衣禮坦也

坦然正白無文采也

祿衣祿然黑色也

韞蔽也所

以蔽膝前也婦人蔽膝亦如之齊人謂之巨巾田家婦
女出自田野以覆其頭故因以為名也又曰跪襜跪時
襜襜然張也 佩倍也言其非一物有倍貳也有珠有
玉有容刀有帨巾有觶之屬也 襦熨也言溫熨也

袴跨也兩股各跨別也

褶襲也覆上之言也

禪衣

言無裏也

襦屬也衣裳上下相連屬也荊州謂禪衣

曰布襦亦是襜褕言其襜褕弘裕也

講禪衣之無襠

者也言袖夾直形如溝也 中衣言在小衣之外大衣

之中也 襖襠其一當胸其一當背也 帕腹橫帕其

腹也 抱腹上下有帶抱裹其腹上無襠者也 心衣

抱腹而施鉤肩鉤肩之間施一襠以奄心也 衫芟也

衫末無袖端也 有裏曰複 無裏曰單 反閉襦之

小者也却向著之領反於背後閉其襟也 婦人上服

曰袿其下垂者上廣下狹如刀圭也 襖撰也青絳為

之緣也 裙下群也連接裾幅也 緝下橫縫緝其下

也 緣裙裙施緣也 緣襦襦施緣也 帔披也披之

肩背不及下也 直領邪直而交下亦如丈夫服袍方

也 交領就形名之也 曲領在內以中襟領上橫壅

頸其狀曲也 單襦如襦而無絮也 要襦形如襦其

要上翹下要齊也 半袖其袂半襦而施袖也 留幕

冀州所名大褶下至膝者也留牢也幕絡也言牢絡在

衣表也 袍丈夫著下至跗者也袍苞也苞內衣也婦

人以絳作衣裳上下連四起施緣亦曰袍義亦然也齊

人謂如衫而小袖曰侯頭侯頭猶言解瀆臂直通之言也 被被也被覆人也 衾广也其下廣大如广受人也 汗衣近身受汗垢之衣也詩謂之澤受汗澤也或曰鄙袒或曰差袒作之用六尺裁足覆胸背言羞鄙於袒而衣此耳 禪貫也貫兩脚上繫要中也 偏所以自逼束今謂之行滕言以裹脚可以跳騰輕便也 襪末也在脚末也 履禮也飾足所以為禮也 復其下曰烏烏腊也行禮久立地或泥濕故復其末下使乾腊

也 屨拘也所以拘足也 齊人謂韋屨曰扉扉皮也
以皮作之不借言賤易有宜各自蓄之不假借人也

齊人云搏腊搏腊猶把鮓麤貌也荆州人曰麤麻韋車
皆同名也麤措也言所以安措足也 屩蹻也出行著
之蹻蹻輕便因以為名也 屨措也為兩足措以踐泥

也 鞞跨也兩足各以一跨騎也 鞞鞞鞞之缺前壅

者北地所名也鞞鞞猶速獨足直前之言也 鞋解也

著時縮其上如履然解其上則舒解也 帛屨以帛作

之如屨者不曰帛屨者屨不可踐泥也屨踐泥者也此亦可以步泥而浣之故謂之屨也 晚下如舄其下晚晚而危婦人短者著之可以拜也 鞞韋履深頭者之名也鞞襲也以其深襲覆足也 仰角屨上施履之名也行不得蹶當仰履角舉足乃行也

釋宮室

宮穹也屋見於垣上穹隆然也 室實也人物實滿其中也 室中西南隅曰奧不見戶明所在秘奧也 西

北隅曰屋漏禮每有親死者輒撤屋之西北隅薪以爨
竈煮沐供諸喪用時若值雨則漏遂以名之也必取是
隅者禮既祭改設饌于西北隅令撤毀之示不復用也
東南隅曰突突幽也亦取幽冥也 東北隅曰窳窳養
也東北陽氣始出布養物也 中央曰中雷古者寢穴
後室之雷當今之棟下直室之中古者雷下之處也
宅擇也擇吉處而營之也 舍於中舍息也 宇羽也
如鳥羽翼自覆蔽也 屋亦與也其中溫與也 廟貌

也先祖形貌所在也 寢寢也所寢息也 城盛也盛

受國都也 郭廓也廓落在城外也 城上垣曰睥睨

言於其孔中睥睨非常也亦曰裨裨裨也言裨助城之
高也亦曰女墻言其卑小比之於城若女子之於丈夫
也 寺嗣也治事者嗣續於其內也 廷停也人所集

之處也 獄确也實确人之情偽也又謂之牢言所在

堅牢也又謂之圜土築其表墻其形圜也又謂之囹圄
囹圄領也囹御也領錄囚徒禁御之也 亭停也亦人所

傳集也 傳傳也人所止息而去後人復來轉相傳無

常主也 瓦踝也踝确堅貌也亦言腓也在外腓見也

梁彊梁也 柱住也 穩隱也所以隱桷也或謂之

望言高可望也或謂之棟棟中也居屋之中也 桷确

也其形細而踈确也或謂之椽椽傳也相傳次而布列

也或謂之椽在檣旁下列衰衰然垂也 栒旅也連旅

旅也或謂之椹椹縣也縣連椽頭使齊平也上入曰爵

頭形似爵頭也 楣眉也近前若面之有眉也 楛儒

也梁上短柱也椽儒猶侏儒短故以名之也 牾在梁

上兩頭相觸牾也 欒欒也其體上曲欒拳然也 盧

在柱端都盧負屋之重也 斗在欒兩頭如斗也斗負

上負檑也 笮迤也編竹相連迫迤也 屋脊曰甍甍

蒙也在上覆蒙屋也 壁辟也辟禦風寒也 墻障也

所以自障蔽也 垣援也人所依阻以為援衛也 墉

容也所以蔽隱形容也 籬籬也以柴竹作之疏籬籬

也青徐曰椳椳居也居於中也 柵蹟也以木作之上

平蹟然也又謂之撤撤緊也誦誦然緊也 殿有殿鄂

也陛卑也有高卑也天子殿謂之納陛言所以納人言之階陛也 階梯也如梯之有等差也 陳堂塗也言

賓主相迎陳列之處也 屏自障屏也 蕭廡在門內

蕭肅也將入於此自肅敬之處也 宁佇也將見君所

佇立定氣之處也 序次序也 夾室在堂兩頭故曰

夾也 堂猶堂堂高顯貌也 房旁也在堂兩旁也

楹亭也亭亭然孤立旁無所依也齊魯讀曰輕輕勝也

孤立獨處能勝任上重也

簷檐也接檐屋前後也

雷流也水從屋上流下也

闕在門兩旁中央闕然為

道也

呆愚在門外呆復也愚思也臣將入請事於此

復重思之也

觀觀也於上觀望也

樓謂牖戶之間

有射孔樓樓然也

臺持也築土堅高能自勝持也

櫓露也露上無屋覆也

門捫也在外為人所捫摸也

障衛也

戶護也所以謹護閉塞也

窓聰也於內

窺外為聰明也

屋以草蓋曰茨茨次也次比草為之

也 寄上曰廬廬慮也取自覆慮也 草圓屋曰蒲蒲

敷也總其上而敷下也又謂之庵庵奄也所以自覆奄也 大屋曰廡廡懣也懣覆也并冀人謂之庠庠正也

屋之正大者也 井清也泉之清潔者也井一有水一

無水曰灂灂竭也灂有水聲灂灂也 竈造也造創

食物也爨銓也銓度甘辛調和之處也 倉藏也藏穀

物也 庫舍也物所在之舍也故齊魯謂庫曰舍也

廡刂也刂聚也牛馬之所聚也 廩矜也寶物可矜惜

者投之其中也 困縲也藏物縲縲束縛之也 庾裕也言盈裕也露積之言也盈裕不可稱受所以露積之也 困屯也屯聚之也 圉以草作之團團然也 廁言人雜在上非一也或曰溷言溷濁也或曰圉至穢之處宜常修治使潔清也或曰軒前有伏似殿軒也 泥通也通近也以水沃土使相黏近也 塗杜也杜塞孔穴也 堊亞也次也先泥之次以白灰飾之也 墜猶媵媵細澤貌也

釋名卷五

欽定四庫全書薈要卷三千三百十八

經部

釋名卷六

漢 劉熙 撰

釋牀帳

人所坐臥曰牀。牀，衽也。所以自衽載也。長狹而卑曰榻。言其鶴榻然近地也。小者曰獨坐。主人無二獨所坐也。枰，平也。以板作其體平正也。几，廢也。所以廢物也。筵，行也。舒而平之行衍然也。席，釋也。可卷可釋也。簟，簟也。布之簟，簟然平正也。薦，所以自薦藉也。

蒲草也以蒲作之其體平也 氈旃也毛相著旃旃

然也 褥辱也人所坐褻辱也 裘溲猶屢數毛相離

之言也 榻登施大牀之前小榻之上所以登牀也

貂席連貂皮以為席也 枕檢也所以檢項也 帷圍

也所以自障圍也 幕幕絡也在表之稱也 小幕曰

帟張在人上帟帟然也 幔漫也漫漫相連綴之言也

帳張也張施於牀上也小帳曰斗形如覆斗也 幰

廉也自障蔽為廉恥也 幢容也施之車蓋童童然以

隱蔽形容也 戶幰施於戶外也 牀前帷曰帖言帖帖而垂也 幄屋也以帛木板施之形如屋也 承塵施於上承塵土也 搏辟以席搏著壁也 扞倚也在後所依倚也 屏風言可以屏障風也

釋書契第十九

筆述也述事而書之也 硯研也研墨使和濡也 墨痂也似物痂墨也 紙砥也謂平滑如砥石也 板般也般般平廣也 奏鄒也鄒狹小之言也 札櫛也編

之如櫛齒相比也 簡間也編之篇篇有間也 簿言

可以簿疏密也 笏忽也君有教命及所啓白則書其

上備忽忘也 槩板之長三尺者也槩漸也言其漸漸

然長也 牘睦也手執之以進見所以為恭睦也 籍

籍也所以籍疏人名戶口也 檄激也下官所以激迎

其上之書文也 檢禁也禁閉諸物使不得開露也

璽徙也封物使可轉徙而不可發也 印信也所以封

物為信驗也亦言因也封物相因付也 謁詣也詣告

也書其姓名於上以告所至詣者也 符付也書所敕

命於上付使轉行之也 節赴也執以赴君命也 傳

轉也轉移所在執以為信也 券縑也相約束縑縑以

為限也 劄別也大書中央中破別之也 契刻也刻

識其數也 策書教令於上所以驅策諸下也 漢制

約敕封侯曰冊冊贖也敕使整贖不犯之也 示示也

過所至關津以示之也 詣啓也以君語官司所至詣

也 書庶也紀庶物也亦言著之簡紙永不滅也 畫

挂也以五色挂物上也 書稱刺書以筆刺紙簡之上也又曰寫倒寫此文也書姓字於奏上曰書刺作再拜起居字皆違其體使書盡邊徐引筆書之如畫者也下官刺曰長刺長書中央一行而下之也又曰爵里刺書其官爵及郡縣鄉里也 書稱題題諦也審諦其名號也亦言第因其第次也 書文書檢曰署署予也題所予者官號也 上敕下曰告告覺也使覺悟知己意也 下言上曰表思之於內表施於外也又曰上示之於

上也又曰言言其意也 約約束之也 敕飭也使自警
飭不敢廢慢也 謂猶謂也 猶得敕不自安謂謂然也

釋典藝

三墳墳分也論三才之分天地人之治其體有三也
五典典鎮也制法所以鎮定上下其等有五也 八索
索素也著素王之法若孔子者聖而不王制此法者有
八也 九丘丘區也區別九州土氣教化所宜施者也
此皆三王以前上古義皇時書也今皆亡惟堯典存也

經徑也如徑路無所不通可常用也 緯圍也反覆

圍繞以成經也 圖度也盡其品度也 識織也其義

織微也 易易也言變易也 禮體也得其事體也

儀宜也得事宜也 傳傳也以傳示後人也 記紀也

紀識之也 詩之也志之所之也興物而作謂之興敷

布其義謂之賦事類相似謂之比言王政事謂之雅稱

頌成功謂之頌隨作者之志而別名之也 尚書尚上

也以堯為上始而書其時事也 春秋春秋冬夏終而

成歲春秋書人事卒歲而究備春秋溫涼中象政和也

故舉以為名也 國語記諸國君臣相與言語謀議之

得失也又曰外傳春秋以魯為內以諸國為外外國所

傳之事也 爾雅爾昵也昵近也雅義也義正也五方

之言不同皆以近正為主也 論語紀孔子與諸弟子

所語之言也 法逼也莫不欲從其志逼正使有所限

也 律累也累人心使不得放肆也 令領也理領也

使不相犯也 科課也課其不如法者罪責之也 詔

書詔昭也人暗不見事空則有所犯以此示之使昭然

知所由也 論倫也有倫理也 稱人之美曰讚讚纂

也纂集其美而叙之也 叙杼也杼洩其實宣見之也

銘名也述其功美使可稱名也 誄累也累列其事

而稱之也 謚曳也物在後為曳言名之於人亦然也

譜布也布列見其事也 統緒也主緒人世類相繼

如統緒也 碑被也此本王莽時所設也施其轆轤以

繩被其上以引棺也臣子追述君父之功美以書其上

後人因焉故無建於道陌之頭顯見之處名其文就謂
之碑也 詞嗣也令撰善言相續嗣也

釋名卷六

欽定四庫全書蒼要卷三千三百十九

經部

釋名卷七

漢 劉熙 撰

釋用器

斧甫也甫始也凡將制器始用斧伐木已乃制之也

鎌廉也體廉薄也其所刈稍稍取之又似廉者也 斨

戕也所伐皆戕毀也 仇矛讎也所伐則平如討仇讎

也 錐利也 椎推也耒亦椎也 鑿有所穿鑿也

鑄鑄也有所鑄入也 耜似也似齒之斷物也 犁利

也利則發土絕草根也 檀坦也摩之使坦然平也

鋤助也去穢助苗長也齊人謂其柄曰檀檀然正直也

頭曰鶴似鶴頭也 枷加也加杖於柄頭以撾穗而出

其穀也或曰羅枷三杖而用之也或曰了了杖轉於頭

故以名之也 鋪挿也挿地起土也或曰銷銷削也能

有所穿削也或曰鐸鐸剗也剗地為坎也其板曰葉象

木葉也 把播也所以播除物也 拂撥也撥使聚也

耨以鋤嫗耨禾也 鑄亦鋤類也鑄迫也 鑄溝也

既割去壟上草又辟其土以壅苗根使壟下為溝受水
潦也 鉗殺也言殺草也 銓穫黍鐵也銓銓斷黍穗
聲也 斲謹也板廣不可得制削又有節則用此斲之
所以詳謹令平滅斧跡也 斲斲彌也斲有高下之跡
以此斲彌其上而平之也 鋸倨也其體直所截應倨
句之平也 鋤誅也主以誅除物根株也

釋樂器

鍾空也內空受氣多故聲大也 磬罄也其聲罄罄然

堅緻也 鼓郭也張皮以冒之其中空也 執導也所

以導樂作也 鞞裨也裨助鼓節也 聲在前曰朔朔

始也在後曰應應大鼓也 所以懸鼓者橫曰篋篋峻

也在上高峻也從曰虞虞舉也在旁舉篋也篋上之板

曰業刻為牙捷業如鋸齒也 瑟施弦張之瑟瑟然也

箏施弦高急箏箏然也 筑以竹鼓之筑柷之也

箏侯此師延所作靡靡之樂也後出於桑間濮上之地

蓋空國之侯所存也師涓為晉平公鼓焉鄭衛分其地

而有之遂號鄭衛之音謂之淫樂也 柷本出於胡

中馬上所鼓也推手前曰柷引手却曰枹象其鼓時因

以為名也 塤喧也聲獨喧喧然也 箎啼也聲從孔

出如嬰兒啼聲也 簫肅也其聲肅肅而清也 笙生

也象物貫地而生也 竹之貫匏以匏為之故曰匏也

竽亦是也其中汙空以受簧也 簧橫也於管頭橫施

於中也以竹鐵作於口橫鼓之亦是也 搏拊也以韋

盛糠形如鼓以手附拍之也 祝狀如伏虎如見祝祝

然也故訓為始以作樂也 敵衙也衙止也所以止樂也 舂撞也牘筑也以舂築地為節也 籥躍也氣躍出也 遂滌也其聲滌滌然也 鐃聲鐃鐃也 人聲曰歌歌柯也凡歌之言是其質也以聲吟詠有上下如草木之有柯葉也故充冀言歌聲如柯也 竹曰吹吹推也以氣推發其聲也 吟嚴也其聲本出於憂愁故其聲嚴肅使人聽之悽歎也

釋兵

弓穹也張之穹隆然也其末曰簫言簫梢也又謂之弭
以骨為之滑弭弭也中央曰弣弣撫也人所持撫也簫
弣之間曰淵淵宛也言曲宛也 弩怒也有勢怒也其
柄曰臂似人臂也鈎弦者曰牙似齒牙也牙外曰郭為
牙之規郭也下曰懸刀其形然也合名之曰機言如機
之巧也亦言如門戶之樞機開闔有節也 矢指也言
其有所指向迅疾也又謂之箭前進也其本曰足矢形
似木木以下為本本以根為足也又謂之鏑鏑敵也可

以禦敵也齊人謂之鏃鏃族也言其所中皆族滅也關
西曰鈺鈺鉸也言有交刃也其體曰幹言挺幹也其旁
曰羽如鳥羽也鳥須羽而飛矢須羽而前也齊人曰衛
所以導衛矢也其末曰枯枯會也與弦會也枯旁曰义
形似义也其受之器以皮曰箛謂柔服用之也織竹曰
竿相迫竿之名也步义人所帶以箭义其中也馬上曰
韃韃建也弓矢並建立其中也 刀到也以斬伐到其
所乃擊之也其末曰鋒言若鋒刺之毒利也其本曰環

形似環也其室曰削削峭也其形峭殺裏刀體也室口
之飾曰琫琫捧也捧束口也下末之飾曰琕琕卑也在
下之言也短刀曰拍髀帶時拍髀旁也又曰露拍言露
見也 佩刀在佩旁之刀也或曰容刀有刀形而無刃
備儀容而已 剪刀剪進也所剪稍進前也 書刀給
書簡札有所刊削之刀也 封刀鉸刀削刀皆隨時名
之也 戟格也旁有枝格也 戈句矛戟也戈過也所
刺擣則決過所鉤引則制之弗得過也 車戟曰常長

丈六尺車上所持也八尺曰尋倍尋曰常故稱常也

手戟手持摘之戟也 矛冒也刃下冒矜也下頭曰

鑄鑄入地也松櫝長三尺其矜宜輕以松作之也櫝速

櫝也前刺之言也 矛長丈八尺曰稍馬上所持言其

稍稍便殺也又曰激矛激截也可以激截敵陣之矛也

仇矛頭有三义言可以討仇敵之矛也 夷矛夷常

也其矜長丈六尺不言常而曰夷者言其可夷滅敵亦

車上所持也

矜徐本
作移

矛長九尺者也矜霍也所中霍

然即破裂也 及矛及殊也長丈二尺而無刃有所撞
挫於車上使殊離也 盾避也跪其後避以隱避也大
而平者曰吳魁本出於吳為魁帥者所持也隆者曰須
盾本出於蜀須所持也或曰羌盾言出於羌也約脇而
鄒者曰陷虜言可以陷破虜敵也今謂之曰露見是也
狹而長者曰步盾步兵所持與刀相配者也狹而短者
曰子盾車上所持者也子小稱也以縫編板謂之木絡
以犀皮作之曰犀盾以木作之曰木盾皆因所用為名

也 彭排彭旁也在旁排敵禦攻也 鎧猶塏也塏堅

重之言也或謂之甲似物孚甲以自禦也 劔檢也所

以防檢非常也又其在身拱時斂在臂內也其旁鼻曰

鐔鐔尋也帶所貫尋也其末曰鋒鋒末之言也 鋌延

也達也去此至彼之言也 鈎鑲兩頭曰鈎中央曰鑲

或推鑲或鈎引用之之互也 九旗之名日月為常畫

日月於其端天子所建言常明也 交龍為旂旂倚也

畫作兩龍相依倚也通以赤色為之無文采諸侯所建

也通帛為旃旃戰也戰戰恭已而已也三孤所建象無

事也 熊虎為旗軍將所建象其猛如虎與眾期其下

也 鳥隼為旟旟譽也軍吏所建急疾趨事則有稱譽

也 雜帛為旒以雜色綴其邊為翅尾也將帥所建象

物雜也 龜蛇為旐旐兆也龜知氣兆之吉凶建之於

後察度事宜之形兆也 金羽為旛旛猶滑也順滑之

貌也 析羽為旌旌精也有精光也 綏有虞氏之旌

也注旒竿首其形榮榮然也 綏夏后氏之旌也其形

衰衰也 白旆殷旌也以帛繼旒末也 翽陶也其貌
陶陶下垂也 幢童也其貌童童也 旛幡也其貌幡
幡也 校號也將帥號令之所在也 節為號令賞罰
之節也 鐸度也號令之限度也 金鼓金禁也為進
退之禁也 戚感也斧以斬斷見者皆感懼也 鉞豁
也所向莫敢當前豁然破散也

釋車

車古者曰車聲如居言行所以居人也今曰車車舍也

行者所處若車舍也 天子所乘曰玉輅以玉飾車也

輅亦車也謂之輅者言行於道路也象輅金輅木輅各隨所以為飾名之也 鈎車以行為陣鈎股曲直有正

夏所制也 胡車車胡以罪沒入為官奴者引之殷所

制也 元戎車在軍前啓突敵陣周所制也 輦車人

所輦也 柏車柏伯也大也丁夫服任之小車也 羊

車羊祥也祥善也善飾之車今犢車是也 墨車漆之

正黑無文飾大夫所乘也 重較其較重卿所乘也

役車給役之車也 棧車棧靖也麻靖物之車也皆庶

人所乘也 輶車戎者所乘也 容車婦人所載小車

也其蓋施帷所以隱蔽其形容也 衣車前戶所以載

衣服之車也 獵車所乘以畋獵也 小車駕馬輕小

之車也駕馬宜輕使之局小也 高車其蓋高立載之

車也 安車蓋卑坐乘今吏之乘小車也 羸車羔車

各以所駕名之也 檻車上施欄檻以格猛獸之車也

輶車輶遙也遠也四向遠望之車也 輜車載輜重

臥息其中之車也。輜，厠也。所載衣物雜厠其中也。輶，

車，駟屏也。四面屏蔽，婦人所乘之車也。輜，駟之形，同有

輶。曰輜，無輶曰駟。輶，句也。轅，上句也。衡，橫也。橫，馬

頸上也。游環，在服馬背上，驂馬之外，轡貫之，游移前

却，無常處也。脇，驅在服馬外脇也。陰，陰也。橫側車

前以陰，脊也。鞞，所以引車也。鍍，金塗沃也。治白金以

沃灌，鞞環也。續續，鞞端也。文，鞞車中所坐者也。用虎

皮有文采，因與下鞞相連著也。鞞，伏也。在前人所伏

也 軾式也所伏以式敬者也 軻鞵車中重薦也輕

軻鞵小貂也 轂塼也體堅塼也 轅援也車之大援

也 枕橫在前如臥牀之有枕也 枕橫也橫在下也

薦板在上如薦席也齊人謂車枕以前曰縮言局縮也

究糞曰育御者坐中執御育然也 較在箱上為辜

較也 立人象人立也 或曰陽門在前曰陽兩旁似

門也 楅𣵀也所以扼牛頸也馬曰烏啄下向又馬頸

似烏開口向下啄物時也 隆強言體隆而強也或曰

弓車似弓曲也其上竹曰郎疏相遠晶晶然也 輻複

也重複非一言之也 輞罔也罔羅周倫之外也關西

曰輶言曲輶也或曰輶輶輶也輶連其外也 輪綸也

言彌綸也周匝之言也 輶言輻輶入轂中也 輿舉

也 軸抽也入轂中可抽出也 缸空也其中空也

鐃間也間缸軸之間使不相摩也 轄害也車之禁害

也 輶裏也裏軹頭也 軹指也如指而見於轂頭也

苓橫也在車前織竹作之孔苓苓 蓋在上覆蓋人

也 輦藩也蔽水雨也 輦蓋又也如屋構椽也 杠

公也衆人所公共也 輶輶猶秘齒也在車軸上正輪

之秘齒前却也 履似人履也又曰伏兔在軸上似之

也又曰輶輶伏也伏於軸上也 鈎心從輿心下鈎軸

也 縛在車下與輿相連縛也 崇蹠也在車兩旁蹠

幟使不得進却也 幟憲也禦熱也 紲制也牽制之

也 紛放也防其放弛以拘之也 轡拂也牽引拂戾

以制馬也 勒絡也絡其頭而引之也 銜在口中之

言也 鑣苞也所以在旁苞歛其口也 鞅嬰也喉下
稱嬰言纓絡之也其下飾曰樊纓其形樊樊而上屬纓
也 鞅經也橫經其腹下也 鞅半也拘使半行不得
自縱也 羈檢也所以檢持制之也 韁疆也繫之使
不得出疆限也 鞅道也在後道迫不得使却縮也
負在背上之言也 鞅懸也所以懸縛軛也

釋船

船循也循水而行也又曰舟言周流也其前立柱曰檣

櫻魏也魏魏高貌也 其尾曰施施也後見拖曳也

且弼正船使順流不使他戾也 在旁曰櫓櫓脊也用

膂力然後舟行也 引舟者曰筏筏作也作起也起舟

使動行也 在旁撥水曰櫂櫂濯也濯於水中也且言

使舟櫂進也又謂之札形似札也又謂之楫楫捷也撥

水使舟捷疾也所用斥旁岸曰交一人前一人還相交

錯也 帆泛也隨風張幔曰帆使舟疾汎汎然也 舟

中牀以薦物者曰苓言但有箐如苓牀也南方人謂之

穹窿言濕漏之水窾然從下過也 其上板曰覆言所

覆衆枕也其上屋曰廬象廬舍也其上重室曰飛廬在

上故曰飛也又在上曰爵室於中候望之如鳥雀之警

示也軍行在前曰先登登之向敵陣也 狹而長曰艨

衝以衝突敵船也 輕疾者曰赤馬舟其體正赤疾如

馬也 上下重牀曰艦四方施板以禦矢石其內如牢

檻也 五百斛以上還有小屋曰斥候以視敵進退也

三百斛曰艚艚貂也貂短也江南所名短而廣安不

傾危者也 二百斛以下曰艇其形徑挺一人二人所
行也

釋名卷七

欽定四庫全書薈要卷三千三百二十

經部

釋名卷八

漢 劉熙 撰

釋疾病

疾病者客氣中人急疾也病並也並與正氣在膚體中
也 疹診也有結氣可得診見也 疾久也在體中也
痛通也通在膚脉中也 癢揚也其氣在皮中欲得
發揚使人搔發之而揚出也 眩懸也目視動亂如懸
物遙遙然不定也 歷淫淫從耳鼻中出歷歷然也

禿無髮沐禿也髡頭生創曰瘖髡亦然也 盲茫也茫

茫無所見也 瞽鼓也瞑瞑然目平合如鼓皮也 矇

有眸子而失明蒙蒙無所別也 瞶縮壞也 瞎迄也

膚幕迄迫也 眸子明而不正曰通視言通達目匡一

方也又謂之麗視麗離也言一目視天一目視地目明

分離所視不同也 目匡陷急曰眇眇小也目眇傷赤

曰矇矇末也創在目兩末也 目生膚入眸子曰浸浸

侵也言侵明也亦言浸淫轉大也 蒙籠也如在蒙籠

之內聽不察也 鼻塞曰孰孰久也涕久不通遂至窒

塞也 齟朽也蟲齧之齒缺朽也 瘖啞然無聲也

癭嬰也在頸嬰喉也 癰喉氣著喉中不通積成癰也

消澍澍渴也腎氣不周於胸胃中津潤消渴故欲得

水也 嘔偃也將有所吐脊曲偃也 欬刻也氣奔至

出入不平調若刻物也 喘湍也湍疾也氣出入湍疾

也 吐瀉也故揚豫以東謂瀉為吐也 乳癰曰妬妬

褚也氣積褚不通至腫潰也 心痛曰疝疝詵也氣詵

洗然上而痛也 脤否也氣否結也 小兒氣結曰哺

哺露也哺而寒露乳食不消生此疾也 注病一人死

一人復得氣相灌注也 泄利言其出漏泄而利也下

重而赤白曰臍言厲臍而難也 陰腫曰墮氣下墮也

又曰疝亦言洗也洗洗引小腹急痛也 疼卑氣疼疼

然煩也 痔食也蟲食之也 酸遜也遜遁在後也言

脚疼力少行遁在後以遜遁者也 消弱也如見割削

筋力弱也 懈解也骨節解緩也 厥逆氣從下厥起

上行入心脇也 瘡酷虐也凡疾或寒或熱耳而此疾

先寒後熱兩疾似酷虐者也 疥斷也癢搔之齒頰斷

也 癬徙也浸淫移徙處日廣也故青徐謂癬為徙也

胗展也癢搔之捷展起也 腫鍾也寒熱氣所鍾聚

也 癰壅也氣壅否結裏而潰也 痲慄也小便難慄

慄然也 創戕也戕毀體使傷也 痍侈也侈開皮肉

為創也 癥漫也生漫故皮也 痕根也急相根引也

瘤流也血流聚所生瘤腫也 贅屬也橫生一肉屬

著體也 朮丘也出皮上聚高如地之有丘也

釋喪制

人始氣絕曰死死漸也就消漸也 士曰不祿不復食

祿也大夫曰卒言卒竟也 諸侯曰薨薨壞之聲也

天子曰崩崩壞之形也崩礮聲也 殪翳也就隱翳也

徂落徂祚也福祉殞落也徂亦往也言往去落也

罪人曰殺殺竄也埋竄之使不復見也 罪及餘人曰

誅誅株也如株木根枝葉盡落也 死於水者曰溺溺

弱也不能自勝之言也 死於火者曰燒燒焦也 戰

死曰兵言死為兵所傷也 下殺上曰弑弑伺也伺間

而後得施也 懸繩曰縊縊阨也阨其頸也 屈頸閉

氣曰雉經如雉之為也 獄死曰考竟考得其情竟其

命於獄也 市死曰棄市市衆所聚言與衆人共棄之

也 斫頭曰斬斬腰曰腰斬斬暫也暫加兵即斷也

車裂曰轘轘散也肢體分散也 煮之於鑊曰烹若烹

禽獸之肉也 槌而死曰掠掠狼也用威大暴於豺狼

也 老死曰壽終壽久也終盡也生已久遠氣終盡也

少壯而死曰夭如取物中夭折也 未二十而死曰

殤殤傷也可哀傷也 父死曰考考成也亦言槁也槁

於義為成凡五材膠漆陶冶皮革乾槁乃成也 母死

曰妣妣比也比之於父亦然也 漢以來謂死為物故

言其諸物皆就朽故也既定死曰尸尸舒也骨節解舒

不復能自勝斂也 衣尸曰襲襲匝也以衣周匝覆衣

之也 以囊韜其形曰冒覆其形使人勿惡也 已衣

所以束之曰絞衿絞定也交結之也衿禁也禁繫之也

含以珠貝含其口中也握以物著尸手中使握之

也衣尸棺曰歛歛藏不復見也棺闕也關閉也

槨廓也廓落在表之言也尸已在棺曰柩柩究也送

終隨身之制皆究備也於西壁下塗之曰殯殯賓也

賓客遇之言稍遠也塗曰攢攢木於上而塗之也三

日不生者成服曰縗縗推也言傷推也經實也傷

推之實也絞帶絞麻總為帶也三年之縗曰斬不緝

其末直剪斬而已期曰齋齋齊也 九月曰大功其布

如麤大之功不善治練之也 小功精細之功小有飾

也 總麻總絲也績麻總如絲也 錫線錫治也治其

麻使滑易也 疑儼也儼於吉也 總細如總也 䟽

䟽如總也 環經末無餘散麻圓如環也 弁經如爵

弁而素如經也 重死者之資重也含餘米以為粥投

之甕而懸之比葬末作主權以重主其神也 葬藏也

壙曠也藏於空曠處也 輿棺之車曰輻輻耳也懸

於左右前後銅魚搖絞之屬耳耳然也 其蓋曰柳柳

聚也衆飾所聚亦其形儂也亦曰鼈甲以鼈甲亦然也

其旁曰牆似屋牆也 翣齊人謂扇為翣此似之也象

翣扇為清涼也翣有黼有畫各以其飾名之也兩旁引

之曰披披擺也各於一旁引擺之備傾倚也 從前引

之曰緋緋發也發車使前也 懸下墻曰綵綵將也徐

徐將下之也 棺束曰緘緘函也古者棺不釘也旁際

曰小要其要約小也又謂之衽衽任也任制際會使不

解也 送死之器曰明器神明之器異於人也 塗車

以泥塗為車也 芻靈束草為人馬靈名之也 喪祭

曰奠奠停也言停久也亦言樸奠合體用之也 朔望

祭曰殷奠所用殷衆也 既葬還祭於殯宮曰虞謂虞

樂安神使還此也 又祭曰卒哭卒止也止孝子無時

之哭朝夕而已也 又祭曰祔祭於祖廟以後死孫祔

於祖也 期而小祥亦祭名也孝子除首經服練冠也

祥善也加小善之飾也 又期而大祥亦祭名也孝子

除練服服朝服縞冠加大善之飾也 間月而禫亦祭

名也孝子之意澹然哀思益衰也 冢腫也象山頂之

高腫起也 墓慕也孝子思慕之處也 丘象丘形也

陵亦然也 假葬於道側曰殍殍翳也 日月未滿而

葬曰渴言謂欲速葬無恩也 過時而不葬曰慢謂慢

傲不念早安神也 葬不如禮曰埋埋瘞也趨使葬腐

而已也 不得埋之曰棄謂棄之於野也 不得停尸

曰捐捐於地邊者也



釋名卷八



覆校官助教臣吳省蘭
校對官庶吉士臣朱攸

謄錄貢生臣潘沛然